

Na osnovu člana IV 4. a) Ustava Bosne i Hercegovine, Parlamentarna skupština Bosne i Hercegovine, na 51. sjednici Doma naroda, održanoj 28. novembra 2005. godine, i a 71. sjednici Predstavničkog doma, održanoj 21. decembra 2005. godine, usvojila je

## **ZAKON O JAVNOM RADIO-TELEVIZIJSKOM SERVISU BOSNE I HERCEGOVINE**

### **Član 1. (Predmet Zakona)**

Ovim zakonom uređuje se Javni radio-televizijski servis Bosne i Hercegovine (u dašnjem tekstu: Javni RTV servis BiH), kao i njegova registracija, djelatnost i organizacija.

### **Član 2. (Definicije)**

Definicije iz Zakona o Javnom radio-televizijskom sistemu Bosne i Hercegovine (u dašnjem tekstu: Zakon Sistema) odnose se na ovaj zakon.

U tom smislu:

marketinško oglašavanje je svaki plaćeni, slično nadoknađeni ili samo-promotivni javni oglas, uključujući sponzorisanje (kao što je definisano dalje u tekstu), u svrhu promocije, prodaje, kupovine ili iznajmljivanja proizvoda ili usluga, promocije ideje ili cilja, ili uzrokovanja nekog drugog željenog efekta od oglašivača ili samog Servisa;

Javni RTV servis BiH je fizičko ili pravno lice s uredničkom odgovornošću za pripremanje usluge radio i televizijskog programa, namijenjenog emitovanju za javnost;

evropski programi podrazumijevaju kreativne programe čiju proizvodnju ili koprodukciju vode evropska fizička ili pravna lica;

sponzorisanje je učešće fizičkog ili pravnog lica, koje nije uključeno u aktivnosti emitovanja ili u proizvodnju audio-vizuelnih djela, u direktnom ili indirektnom finansiranju programa, u svrhu promocije njihovog imena, zaštitnog znaka, djelatnosti ili dostignuća;

emitovanje je početna emisija putem zemaljskog, kablovskog ili satelitskog predajnika, u kodiranoj ili dekodiranoj formi, radio ili televizijske usluge namijenjene javnosti;

virtuelno marketinško oglašavanje je upotreba elektronskih sistema koji djelimično mijenjaju televizijski signal tako što se u televizijsku sliku dodaje marketinški oglas, koji u stvarnosti ne postoji na mjestu sa kojeg se signal prenosi;

reemitovanje je vremenski odgođena emisija putem zemaljskog, kablovskog i satelitskog predajnika, u kodiranoj ili dekodiranoj formi, radio ili televizijske usluge namijenjene javnosti;

telešoping su spotovi kojima se putem emisije TV signala vrši prodaja određenih proizvoda, a čija je dužina trajanja određena principima Evropske konvencije o prekograničnoj TV.

RTV taksa je taksa na posjedovanje radio ili TV prijemnika u domaćinstvu i kod pravnog lica;

dozvola Sistema obuhvata pojedinačne dozvole tri javna RTV servisa.

### **Član 3. (Registracija)**

Javni RTV servis BiH upisuje se kao javno preduzeće u sudski registar kod nadležnog suda u svom sjedištu. U sudski registar upisuju se:

- a) firma i sjedište;
- b) djelatnost;
- c) odgovornost u unutrašnjem pravnom prometu;
- d) odgovornost u spoljnotrgovinskom pravnom prometu i
- e) imena lica ovlašćenih za zastupanje.

### **Član 4. (Firma)**

(1) Naziv javnog preduzeća je radio-televizija Bosne i Hercegovine.

(2) Skraćeni naziv radio-televizije Bosne i Hercegovine je BHRT.

(3) Nazivi javnih preduzeća BHRT i JRTSBIH moraju se istaknuti na zgradi u kojoj je sjedište BHRT-a, napisani na jezicima koji su u službenoj upotrebi u Bosni i Hercegovini, latinicom i ćirilicom.

### **Član 5. (Sjedište)**

Sjedište BHRT-a je u Sarajevu.

### **Član 6. (Prava i odgovornost)**

(1) BHRT je pravno lice i može u pravnom prometu sticati prava i preuzimati obaveze, biti vlasnik pokretnih i nepokretnih stvari, te biti stranka u postupcima pred sudovima, drugim državnim organima i tijelima s javnim ovlaštenjima.

(2) BHRT odgovara za obaveze cjelokupnom svojom imovinom.

#### **Član 7. (Djelatnost)**

(1) Djelatnosti BHRT-a su sljedeće:

- a) naručivanje, pripremanje, proizvodnja, prenos i emitovanje vlastitih radijskih i televizijskih programa i multimedijalnih sadržaja;
- b) izdavanje i raspodjela štampanog materijala u vezi sa sopstvenim programom ili sa pitanjima o emitovanju uopšte;
- c) skladištenje i korišćenje arhiva tonskih i video-zapisa;
- d) organizacija kulturnih, muzičkih i drugih događaja;
- e) istraživanje javnog mnjenja, marketinške usluge i usluge oglašavanja;
- f) pružanje usluga teleteksta i djelatnosti koji su u vezi s ostalim pošima tehnologije emitovanja.

(2) Putem zajedničkog pravnog subjekta Korporacije javnih RTV servisa Bosne i Hercegovine (u daljnjem tekstu: Korporacija), BHRT učestvuje u sljedećem:

- a) nabavka programa,
- b) uvođenje i korišćenje novih tehnologija u oblasti emitovanja,
- c) razmjena i učešće u zajedničkim tehničkim i drugim tehnološkim projektima sa drugim javnim radio- televizijskim agencijama i producentima programa,
- d) druge aktivnosti u skladu sa Zakonom Sistema.

(3) Ako je u skladu s uslovima dozvole Sistema i na osnovu odluke Regulatorne agencije za komunikacije Bosne i Hercegovine (u daljnjem tekstu: Regulatorna agencija), BHRT može pružati dodatne programske servise, bez obzira na metod dostave (npr. on-line) ili modalitete finansiranja (npr. pay-TV).

(4) Statutom se mogu odrediti i druge djelatnosti, pod uslovom da nisu u suprotnosti s osnovnom djelatnošću BHRT-a određenom ovim zakonom.

#### **Član 8. (Zastupljenost prema Ustavu BiH)**

(1) BHRT u obavljanju djelatnosti i u kadrovskoj strukturi sprovodi relevantne ustavne odredbe u vezi s istim pravima konstitutivnih naroda i ostalih u Bosni i Hercegovini.

(2) Programi će biti prilagođeni potrebama konstitutivnih naroda i građana BiH, uređivani i emitovani ravnopravno na tri jezika u službenoj upotrebi u Bosni i Hercegovini i dva pisma.

#### **Član 9. (Programski servisi)**

(1) Djelatnost BHRT-a ostvaruje se proizvodnjom i emitovanjem programa na najmanje jednoj radijskoj i jednoj televizijskoj mreži, na vlastitim frekvencijama za teritoriju Bosne i Hercegovine.

(2) BHRT je ovlašten da prenosi programe putem zemaljskih mreža, satelita, kablovskim ili bilo kojim drugim tehničkim sredstvima.

(3) Zahtjevi za proširenje usluga ili dodatnim kanalima podnose se Regulatornoj agenciji.

#### **Član 10. (Međunarodna razmjena i ekskluzivna prava)**

(1) Radi ostvarivanja interesa cjelokupnog stanovništva Bosne i Hercegovine, BHRT je dužan da obezbijedi pokrivanje najvažnijih kulturnih, sportskih, zabavnih i drugih događaja koji se održavaju u zemlji i svijetu.

(2) Emiteri čiji programi nisu dostupni cjelokupnom stanovništvu Bosne i Hercegovine nemaju pravo na dobijanje ekskluzivnih prava za sljedeće sportske događaje:

- a) olimpijske igre;
- b) svjetska i evropska prvenstva u fudbalu, košarci, rukometu i drugim sportovima;
- c) utakmice u okviru zvaničnih međunarodnih takmičenja u kojima nastupaju reprezentacije Bosne i Hercegovine;

d) međunarodna takmičenja koja se održavaju u Bosni i Hercegovini.

(3) BHRT će uložiti sve napore da stekne ekskluzivna prava na sve važne događaje, kako su definisani i pobrojani u stavu (2) ovog člana.

#### **Član 11. (Članstvo u međunarodnim organizacijama)**

(1) Korporacija zastupa interese BHRT-a u međunarodnim radiodifuznim organizacijama i asocijacijama.

(2) BHRT je dužna da obezbijedi korišćenje prava i izvršavanje obaveza koje proizlaze iz članstva u Evropskoj uniji za radio-difuziju (EBU-UER) i iz Konvencije o prekograničnoj televiziji.

**Član 12.**  
**(Statut)**

- (1) BHRT ima Statut, kojim se utvrđuje njegova unutrašnja organizacija, ovlaštenja i način odlučivanja pojedinih organa, te uređuju druga pitanja značajna za obavljanje djelatnosti i poslovanje BHRT-a.
- (2) Statut se objavljuje u "Služenom glasniku BiH".
- (3) BHRT ima i druge opšte akte, u skladu sa zakonom i Statutom.

**Član 13.**  
**(Satelitski program)**

- (1) BHRT može da obavlja djelatnost međunarodnog digitalnog satelitskog operatera radi pružanja RTV usluga građanima Bosne i Hercegovine koji žive van njene teritorije.
- (2) BHRT mora posebno da iskaže cjelokupne troškove pružanja usluga putem međunarodnog digitalnog satelita, uključujući troškove prenosa, tehničkih sredstava, personala i programa, te da ih jasno razdvoji od troškova pružanja domaćih usluga, u skladu sa svojom dozvolom.
- (3) Sredstva dobijena za pružanje usluge putem međunarodnog digitalnog satelita ne smiju se koristiti za subvencionisanje prenosa programa BHRT-a za stanovništvo Bosne i Hercegovine koje živi na njenoj teritoriji.
- (4) Pri pružanju međunarodne satelitske usluge, BHRT mora da obezbijedi punu primjenu međunarodnih i domaćih zakona kojim su uređeni zaštita autorskih i srodnih prava i intelektualno vlasništvo.

**Član 14.**  
**(Produkcioni kapaciteti)**

Korporacija, u skladu sa Zakonom Sistema, upravlja prostornim, proizvodnim i tehničkim kapacitetima BHRT-a.

**Član 15.**  
**(Arhiva)**

- (1) BHRT ima sva prava na arhivsku građu bivšeg Javnog preduzeća Radio-televizija Bosne i Hercegovine, i dužan je da se o njoj stara sa posebnom pažnjom, kao o neprocjenjivoj kulturno-istorijskoj vrijednosti i zajedničkom dobru svih naroda i građana Bosne i Hercegovine.
- (2) BHRT ima sva prava i na novo intelektualno vlasništvo koje BHRT doda u svoju arhivu.
- (3) Drugi javni RTV servisi imaju pristup arhivskoj građi BHRT-a i obratno.
- (4) Korporacija rukovodi postupkom čuvanja, obrade i korišćenja arhivske građe u skladu sa važećim zakonima i ugovor o upravljanju zaključuje se između BHRT-a i Korporacije.

**Član 16.**  
**(Položaj zaposlenih)**

Na pravni položaj zaposlenih u BHRT-u, uslove za zaključenje ugovora o radu, plate i druga pitanja primjenjuju se opšti propisi o radu i Statut.

**Član 17.**  
**(Minimum radnih obaveza)**

- (1) U slučaju štrajka radnika, ne smiju da budu ugrožene osnovne programske funkcije BHRT-a.
- (2) Generalni direktor, nakon konsultacija sa predstavnikom većinskog sindikata, određuje radnike BHRT-a koji će obavljati osnovne programske funkcije iz stava (1) ovog člana.
- (3) Ako radnici određeni za obavljanje osnovnih programskih funkcija odbiju da rade u skladu s ovim članom, generalni direktor može za obavljanje ovih poslova da angažuje druge radnike koji nisu članovi sindikata BHRT-a, kao i lica koja nisu zaposlena u BHRT-u.

**Član 18.**  
**(Primjena drugih zakona)**

Na poslovanje BHRT-a koje nije posebno uređeno ovim zakonom primjenjuju se odgovarajući zakoni koji važe u mjestu sjedišta BHRT-a.

**Član 19.**  
**(Imovina)**

- (1) Imovinu BHRT-a čine sredstva koja su prenesena u postupku likvidacije Javnog preduzeća Radio-televizije Bosne i Hercegovine, kao i sredstva stečena iz drugih izvora.

(2) Korporacija upravlja imovinom u skladu sa Zakonom Sistema.

**Član 20.**  
**(Finansiranje redovne djelatnosti)**

(1) Redovna djelatnost BHRT-a primarno se finansira iz sljedećih izvora:

- a) RTV taksi;
- b) marketinga.

Raspodjela prihoda prikupljenog iz navedenih izvora vršiće se u skladu sa članom 23. Zakona Sistema.

(2) BHRT može da ostvaruje prihode iz vlastite djelatnosti, uključujući komercijalizaciju autorskih i srodnih prava, proizvodnju i prodaju audio-vizuelnih djela, pružanje usluga teleteksta i drugih servisa.

**Član 21.**  
**(Odgovornost za finansiranje)**

(1) Generalni direktor priprema finansijski plan za narednu godinu i dostavlja ga na usvajanje Upravnom odboru BHRT-a (u daljnjem tekstu: Upravni odbor) najkasnije do 1. novembra tekuće godine.

(2) Generalni direktor podnosi izvještaj o poslovanju za prethodnu godinu i dostavlja ga na usvajanje Upravnom odboru najkasnije do 28. februara svake godine.

(3) U svakoj finansijskoj godini BHRT mora da obezbijedi da su njegovi ukupni rashodi pokriveni njegovim ukupnim prihodima.

**Član 22.**  
**(Obaveza revizije)**

Obavezna je godišnja revizija poslovanja BHRT-a koju sprovodi nezavisna revizorska firma.

**Član 23.**  
**(Organi BHRT-a)**

(1) Organi BHRT-a su:

- a) Upravni odbor,
- b) Poslovodni odbor.

(2) Radom BHRT-a rukovodi Poslovodni odbor, koji čine generalni direktor i rukovodioci sektora BHRT-a.

(3) Javni RTV servisi moraju da obezbijede naknade za članove njihovih upravnih odbora, uključujući i naknade za rad u Odboru Javnog radio-televizijskog sistema Bosne i Hercegovine za one članove koji su i njegovi članovi.

**Član 24.**  
**(Upravni odbor)**

Upravni odbor zastupa i štiti interese javnosti u pogledu radio i televizijskih programa, vrši nadzor nad cjelokupnim poslovanjem, kao i raspolaganjem imovinom BHRT-a.

**Član 25.**  
**(Sastav Upravnog odbora)**

(1) Upravni odbor ima četiri člana.

(2) Članovi Upravnog odbora mogu biti samo državljani Bosne i Hercegovine.

(3) Upravni odbor ima četiri člana:

- a) po jednog iz reda svakog od konstitutivnog naroda i iz reda ostalih,
- b) dva od ta četiri člana moraju imati prebivalište u Federaciji Bosne i Hercegovine,
- c) dva od ta četiri člana moraju imati prebivalište u Republici Srpskoj.

(4) Članovi Upravnog odbora samostalni su u obavljanju svoje funkcije i ne primaju upute od organa koji ih je imenovao.

(5) Mandat članova Upravnog odbora traje četiri godine i ne može se obnoviti.

(6) Član Upravnog odbora koji je u posljednjoj godini svogčetvorogodišnjeg mandata obavlja dužnost predsjedavajućeg Upravnog odbora u toj godini.

(7) Upravni odbor donosi svoj Poslovnik o radu.

**Član 26.**  
**(Izbor, imenovanje i razrješenje članova Upravnog odbora)**

(1) Parlamentarna skupština BiH imenuje članove Upravnog odbora s rang-liste kandidata koji su ušli u uži izbor (u daljnjem tekstu rang-lista), koju mu dostavlja Regulatorna agencija u roku od 30 dana od dostavljanja rang-liste Parlamentarnoj skupštini BiH. Regulatorna agencija provodi pravedan, otvoren i transparentan postupak izbora, vodeći se standardima rokovima propisanim Zakonom o ministarskim imenovanjima, imenovanjima Savjeta ministara BiH i drugim imenovanjima Bosne i Hercegovine s ciljem izbora najkvalifikovanih kandidata. Postupak za izradu rang-liste Regulatorna agencija počinje četiri mjeseca prije isteka mandata članovima Upravnog odbora.

(2) Za članove Upravnog odbora ne mogu da budu imenovani:

- a) nosioci funkcija u zakonodavnoj, izvršnoj i sudskoj vlasti, na bilo kojem nivou vlasti;
- b) članovi organa političkih stranaka;
- c) zaposleni u BHRT-u, RTFBiH-u i RTRS-u i Korporaciji;
- d) zaposleni u drugim firmama koje obavljaju djelatnost radijskog ili televizijskog emitovanja, uključujući i agencije koje prikupšaju RTV taksu, članovi njihovih uprava ili nadzornih odbora, ili lica koja obavljaju poslove zbog kojih bi moglo doći do sukoba interesa.

(3) Parlamentarna skupština BiH ima ovlaštenje da donese odluku o razrješenju člana Upravnog odbora ako:

- a) član sam zatraži razrješenje,
- b) tri puta neopravdano izostane sa sjednice,
- c) ne učestvuje u radu u vremenu od tri mjeseca.

(4) Parlamentarna skupština Bosne i Hercegovine takođe ima ovlaštenje da donese odluku o razrješenju člana Upravnog odbora na osnovu preporuke Regulatorne agencije, ako član Upravnog odbora nije ispoštovao uslove iz dozvole Sistema i/ili dozvole BHRT-a.

#### **Član 27. (Kvorum i odlučivanje Upravnog odbora)**

(1) Upravni odbor može punovažno da odlučuje ako sjednici prisustvuju najmanje tri člana (kvorum). Upravni odbor odlučuje većinom glasova od ukupnog broja prisutnih članova, a u slučaju istog broja glasova, glas predsjedavajućeg je odlučujući.

(2) Za imenovanje i razrješenje generalnog direktora, usvajanje programskih planova radija i televizije, kao i za donošenje finansijskih planova i godišnjeg budžeta, potrebni su glasovi najmanje tri člana Upravnog odbora.

#### **Član 28. (Naknada za rad članovima Upravnog odbora)**

Članovi Upravnog odbora imaju obavezu da najmanje pet dana u mjesecu rade u Upravnom odboru i za svoj rad imaju pravo na naknadu u iznosu od tri minimalne plate u entitetu iz kojeg dolaze, kao i naknadu razumnih putnih i materijalnih troškova u skladu sa važećim aktima BHRT-a.

#### **Član 29. (Nadležnost Upravnog odbora)**

Upravni odbor nadležan je da:

- a) donosi statut i druge opšte akte;
- b) odlučuje o raspolaganju imovinom, u skladu sa zakonom Statutom;
- c) odlučuje o ulaganjima za razvoj BHRT-a, u skladu sa zakonom i Statutom;
- d) usvaja izvještaje o finansijskom poslovanju;
- e) odobrava godišnji budžet i finansijski plan;
- f) usvaja programske planove za radio i televiziju;
- g) imenuje i razrješava generalnog direktora;
- h) daje saglasnost na imenovanje nosilaca najviših programskih funkcija;
- i) odlučuje o nazivu i logotipu radija i televizije;
- j) prati i kontrolira zakonitost i uspješnost rada BHRT-a;
- k) predstavlja Parlamentu i javnosti godišnje finansijske planove i planove programa i izvještaje o realizaciji tih planova;
- l) obavlja druge poslove, u skladu sa zakonom i Statutom i
- m) obezbjeđuje uslove iz dozvole Sistema.

#### **Član 30. (Savjetodavni organi)**

Upravni odbor može da osnuje savjetodavne organe za razmatranje i savjetovanje o različitim aspektima djelatnosti BHRT-a.

#### **Član 31. (Imenovanje i mandat generalnog direktora)**

(1) Generalnog direktora imenuje Upravni odbor na osnovu javnog konkursa, na način određen u članu 27. stav (2) ovog zakona.

(2) Mandat generalnog direktora traje pet godina i može da bude obnovljen samo jednom.

(3) Generalni direktor može da bude samo lice koje je državljanin Bosne i Hercegovine i koje ispunjava sve uslove predviđene Statutom.

(4) Za generalnog direktora ne može da bude imenovano lice koje obavlja izvršnu, zakonodavnu ili sudsku funkciju na svim nivoima u Bosni i Hercegovini, ili koje je vlasnik odnosno suvlasnik preduzeća koje obavlja djelatnost radijskog ili televizijskog emitovanja i ako je njegova funkcija nespojiva sa Zakonom o sukobu interesa.

**Član 32.**  
**(Nadležnost generalnog direktora)**

- (1) Generalni direktor rukovodi poslovanjem, predstavlja i zastupa BHRT i odgovoran je za zakonitost poslovanja i sprovođenje odluka Upravnog odbora.
- (2) Generalni direktor odgovoran je za obezbjeđenje poštovanja utvrđenih programskih smjernica i principa određenih zakonom.
- (3) Generalni direktor imenuje rukovodno osoblje, u skladu sa najvišim profesionalnim kriterijumima i na način određen statutom.
- (4) Generalni direktor obavlja druge poslove, u skladu sa zakonom i Statutom.
- (5) Generalni direktor odgovara za ispunjenje uslova iz dozvole Sistema i dozvole BHRT-a.
- (6) Generalni direktor obezbjeđuje izradu godišnjeg finansijskog plana i budžeta za Javni RTV servis BiH u saradnji sa generalnim direktorom zajedničkog pravnog subjekta.
- (7) Generalni direktor obezbjeđuje koordinaciju i saradnju sa generalnim direktorima javnih RTV servisa i generalnim direktorom zajedničkog pravnog subjekta.

**Član 33.**  
**(Razrješenje generalnog direktora)**

- (1) Upravni odbor obavezan je da razriješi generalnog direktora u sljedećim slučajevima:
  - a) ako sam zatraži razrješenje u skladu s ugovorom o radu;
  - b) ako nastanu takvi razlozi koji prema posebnim propisima ili propisima kojima se uređuju radni odnosi dovode do prestanka ugovora o radu.
- (2) Upravni odbor može da razriješi generalnog direktora ako ocijeni da generalni direktor ne obavlja svoju funkciju u skladu sa zakonom, dozvolom Sistema, dozvolom, Statutom, opštim aktima i njegovim ugovorom o radu.
- (3) U slučaju razrješenja generalnog direktora, Upravni odbor je dužan odmah da imenuje vršioca dužnosti, a u roku od 60 dana da imenuje novog generalnog direktora.

**Član 34.**  
**(Prestanak BHRT-a)**

- (1) Odluka o prestanku BHRT-a može da bude donesena samo u formi zakona.
- (2) Zakonom o prestanku BHRT-a određuje se postupak prestanka i način raspodjele imovine.

**Član 35.**  
**(Prelazne odredbe)**

- (1) Do uspostavljanja RTV servisa na nivou Bosne i Hercegovine koji će vršiti prenos na vlastitoj frekvenciji, BHRT će emitovati:
  - a) centralnu emisiju vijesti i druge informativne programe;
  - b) najznačajnije međunarodne sportske, kulturne i druge događaje, kad god je to moguće;
  - c) strani program vrhunske produkcije, u kvoti određenoj u dogovoru sa RTRS-om i RTVFBiH-om;
  - d) marketinški oglas i
  - e) druge programe, u dogovoru sa RTVFBiH-om i RTRS-om, u okviru zajedničke programske šeme.
- (2) Programi BHRT-a emituju se u uđarnim terminima i imaju prioritet u korišćenju mreže.

**Član 36.**  
**(Konstituisanje Upravnog odbora)**

- (1) Do dana konstituisanja Upravnog odbora u skladu sa ovim zakonom, traje mandat postojećeg Upravnog odbora Javnog RTV servisa BiH.
- (2) Stupanjem na snagu ovog zakona, Regulatorna agencija će u roku od 30 dana pripremiti rang-listu, a u roku od 60 dana Parlamentarna skupština BiH imenovaće sve članove prvog Upravnog odbora prema odredbama ovog zakona.
- (3) Konstituirajuća sjednica prvog Upravnog odbora biće sazvana u roku od 15 dana od imenovanja svih članova. Upravni odbor dužan je da usvoji Statut, imenuje generalnog direktora i obezbijedi registraciju u roku od 60 dana od konstituisanja.
- (4) Mandat članova Upravnog odbora traje četiri godine, međutim, kada Upravni odbor bude prvobitno konstituisan, članovi Upravnog odbora biće imenovani na sljedeći način:
  - a) jedan član na mandat od četiri godine,
  - b) jedan član na mandat od tri godine,
  - c) jedan član na mandat od dvije godine,
  - d) jedan član na mandat od jedne godine, izabran između članova postojećeg Upravnog odbora Javnog RTV servisa BiH. Ovim postupkom biće uveden princip rotacije među članovima upravnih tijela koji će obezbijediti kontinuitet rada za BHRT.
- (5) Član imenovan na tri godine ostaće na funkciji predsjedavajućeg u trajanju trogodišnjeg mandata. Nakon toga, članovi Upravnog odbora, u skladu sa članom 25. ovog zakona, rotiraće se na dužnosti predsjedavajućeg.

**Član 37.**  
**(Završne odredbe)**

Svi ranije doneseni zakoni i podzakonski akti koji su regulisali Javni RTVservis BiH stupanjem na snagu ovog zakona prestaju da važe.

**Član 38.**  
**(Stupanje na snagu)**

Ovaj zakon stu pa na snagu osmog dana od dana objavljivanja u "Službenom glasniku BiH".

PSBiH broj 255/05  
21. decembra 2005. godine  
Sarajevo

Predsjedavajući  
Predstavničkog doma  
dr Nikola Špirić, s. r.

Predsjedavajući  
Doma naroda  
Mustafa Pamuk, s. r.